



## FSKKP anjur bengkel kesedaran ICT untuk tingkat ekonomi wanita

Lebih 100 orang yang terdiri dari golongan wanita sekitar negeri Pahang menghadiri Bengkel Pengenalan Kesedaran Teknologi Maklumat dan Komunikasi (ICT) bagi meningkatkan ekonomi wanita Negeri Pahang yang diadakan di Dewan Astaka, Universiti Malaysia Pahang (UMP) Kampus Gambang pada 23 Ogos 2014 yang lalu.

Bengkel yang diadakan buat kali ketiga anjuran Fakulti Sistem Komputer & Kejuruteraan Perisian (FSKKP) ini bertujuan memberikan pendedahan kepada golongan wanita berkenaan peranan dan kelebihan ICT di samping memberikan pengetahuan asas berkaitan ICT untuk kegunaan masa hadapan.

Bengkel yang diadakan selama sehari ini juga merupakan salah satu tanggungjawab sosial UMP terhadap masyarakat.

Majlis penutup disempurnakan Pengerusi Jawatankuasa Pembangunan Wanita dan Keluarga, Komunikasi dan Multimedia Negeri Pahang, Dato' Shahaniza Shamsuddin.

"Pada masa kini, komunikasi jalur lebar telah menjadi satu keperluan dalam negara kita, oleh yang demikian, kerajaan telah mempertingkatkan dari semasa ke semasa kemudahan teknologi jalur lebar.

"Sehingga hujung tahun ini, kerajaan telah menyediakan 80 Pusat Internet 1 Malaysia dengan kelengkapan lebih 20 buah komputer untuk dimanfaatkan oleh semua pihak," katanya.

Timbalan Naib Canselor (Akademik & Antarabangsa), Profesor Dato' Dr. Mortaza Mohamed yang hadir mewakili Naib Canselor berkata, gelombang hasil ledakan ICT ini telah mencorakkan transformasi landskap ekonomi tersebut yang menyebabkan kita kini amat bergantung kepada ICT dan teknologi digital untuk urusan kehidupan sehari-hari.

Justeru katanya, UMP bekerjasama dengan CIMB Bank dan Pos Malaysia Berhad dalam menjayakan bengkel ini.

Salah seorang peserta dari Sekolah

Menengah Kebangsaan Bandar Tun Razak, Pavitra Rajan menyifatkan bengkel kali ini sangat bermanfaat kepada beliau dan berharap agar dapat menyertai bengkel sebegini pada masa akan datang.

Turut hadir Timbalan Dekan FSKKP, Dr. Mazlina Abdul Majid dan Pegawai Eksekutif Jabatan Teknologi Perbankan CIMB Kuala Lumpur, Alif Izham Ismail.

